



Sumáriu Kazu
Tribunál Distritál Baukau
Abril 2021

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 3

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika-LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	1
Artigu 154 KP & artigu 2, 3, no 35 letra (a) LKVD	Maus-tratus ba kónjuje	1
Artigu 177 KP	Abuzu seksuál ba menór	1
Totál		3

2. Totál desizaun ne'ebé JSMP monitoriza: 1

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	1
Totál		1

3. Totál kazu ne'ebé sei kontinua prosesu tuir JSMP nia monitorizasaun: 2

B. Deskrisaun sumáriu julgamentu ba desizaun kazu sira:

1. Krime ofensa ba integridade física simples ho natureza violénsia doméstika

Nú. Prosesu : 0097/20. BCBCV
Kompozisaun Tribunál : Singulár
Juis : Dr. Maria Modesta de Almeida Viera
Prokuradór : Dr. Bartolomeu de Araújo
Defeza : Dr. José Maria Caetano Guterres
Desizaun : Pena prizaun fulan 1 suspende ba tinan 1

Iha 29 Abril 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AMT hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 29 Agostu 2020, iha oras tuku 01:00, meiodia arguidu foti ai donan ida no baku dala ida iha lezada nia kelen parte karuk no ka'er lezada nia ulun fai ba didin-lolon nune'e lezada nia matan-fukun kona iha didin-lolon rezulta kanek. Antes ne'e, arguidu ho lezada diskute malu kona-ba nesesidade uma laran.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu, arrepende ninia hahalok no di'ak malu ona ho lezada to'o agora. Arguidu mós hatutan katak forma família iha tinan 2007, oan na'in haat, foin primeiravés baku lezada, nu'udar funsionáriu saniamentu munisípiu Baukau ho vensimentu kada fulan US\$ 110.00.

Alende ne'e, lezada mós kontinua konfirma faktu hotu iha akuzasaun inklui konfirma arguidu nia deklarasaun katak arguidu foin primeiravés baku lezada no to'o agora arguidu la baku ona lezada.

Alegasaun finál

Prokuradór haktuir katak mezmú sira di'ak malu ona no moris hamutuk nafatin maibé atu asegura sira moris hamutuk feliz iha futuru no prevene arguidu nia hahalok atu la hatoman-an uza violénsia hasoru lezada ka membru família, husu ba tribunál atu aplika pena prizaun fulan ida suspende ba tinan ida.

Enkuantu defeza haktuir katak arguidu konfesa faktu sira hotu, arrepende ninia hahalok, di'ak malu ona no durante forma família iha tempu naruk foin primeiravés halo agresaun hasoru lezada, nune'e husu ba tribunál fó pena ne'ebé justu no adekaudu ba arguidu.

Desizaun

Depoisde avalia faktu sira hotu, tribunál prova katak arguidu foti ai donan no baku dala ida iha lezada nia kelen parte karuk no ka'er lezada nia ulun fai ba didin-lolon rezulta matan-fukun kanek. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés komete krime inklui mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Email: ana@jsmp.tl
info@jsmp.tl
Website: <http://jsmp.tl>